

Augsburg, 14. April 1572

An Joachim Camerarius d. Ä.

BSB, Clm 10370, Nr. 304.

Clarissimo viro, sapientia, virtute, autoritate praestanti, D. Ioachimo Camerario, Domino et amico suo colendo. Leipzig.

S. Cum Caselij nostri frater, operam suam perferendi literas ultrò obtulisset, Clariss[ime] vir, Domine et amice colende: facere non potui, quin significarem, Demosthenem meum iam tandem esse editum: sed longè aliter, in Graecis praesertim, quam ego vellem. Habuit enim Perna typographus adolescentem quendam medicum, Gerardum Heideneckum, correctorem, ne deprauatorem dicam, qui pro δοξοσοφίᾳ sua, de industria pleraque mutauit, et confudit, quae à me accuratè ex ratione grammatica, et codicum collatione, emendata distinctaque fuerunt: secutus nescio quod mendosum archetypon. Deinde accessiones Vlpiani et scholiorum non suo loco insertae sunt, sed seorsim expressae, nullo commodo lectoris. Ita multorum annorum lucubratio, quam ornamento mihi fore putaram, vereor ne dedecori sit futura. ἀλλ᾽ ἐπειδὴ τὸ κατορθοῦν οὐκ ἐν τῇ πράξει, ἀλλ᾽ ἐν τῇ προαιρέσει ἔστι: φέρειν ἔμε χρὴ, ἀλλὰ μὴ αἰτιᾶσθαι, τὸ μὴ οὐκ ἀν ἄλλως ἔξον. Integrum exemplum nullum adhuc accepi. Sed ubi accepero: si typographus, homo parum curans mandata mea, vestratib[us] bibliopolis nihil dedit: operam dabo, ut quamprimum partus ille ingenij mei qualiscunque, ab obstetricibus et nutricib[us] non belissimè curatus, ad te perferatur: aequitate tua maximè fretus: quem scio typographi culpam ab interpretis vitijs (quae utinam pauciora essent) facilè seiuncturum. Editum est superiori mense carmen quoddam meum, non tam voluntate mea, quam autoritate τοῦ προσφωνούμενον: quod humanitati tuae inspiciendum mitto. Non me fecere poetam Pierides: satis est numero concludere versum. Vale. Io[annes] Bap[tista] Hainzelius te saluere iubet. Augustae Vindelicorum. Postridie idus Aprilis Anno 1572.

Hiero[nymus] Wolfius
Excellentiae tuae
studiosissimus.